

**Inatsisartut Naalackersuisullu pillugit Inatsisartut inatsisaat nr. 26, 18. november 2010-meersup taamatutaaq Kalaallit Nunaanni Inatsisartunut qinersisarneq pillugu Inatsisartut inatsisaat nr. 9, 31. oktober 1996-imeersoq pillugu Naalackersuisut allannguutissamik UKA2011-imi saqqummiusseqqullugit peqquneqarnissaannik, taamaalilluni inatsisartuni ilaasortat ullumikkut 31-iusut qinersiviup tulliata aallartinnerani 27-iinnangortinneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq, Malik Berthelsen, Siumut)

### **Akissuteqaat**

(Naalackersuisut siulittaasuat)

### **Siullermeerneqarnera**

Inatsisartut qassinik ilaasortaqaarnissaannik apeqqut inimi maani uteqqiattumik oqallisigineqartarpoq. Kingullermik 2009-mi ukiakkut ataatsimiinnermi Inatsisartunut ilaasortat massakkut 31-iusut 25-inngortinneqarnissaannik aalajangiiffigisassatut siunnersuummik saqqummiussisoqarpoq.

Inatsisartunut ilaasortat ikilisinneqarnissaannut tunngavilersuutaasinnaavoq kommunit aaqqissuussaanerisa iluarsartuunneqarneranni Kommuninut suliassat amerlanerit tunniunneqartaleri. Aappaatigut Namminersorlutik Oqartussat suliassanik amerlanerik Naalagaaffimmiit tigusaqarnerisa Inatsisartuni ilaasortat massakkut amerlassusaat taamaaginnarnissaanut tunngavilersuutigineqarsinnaavoq.

Kingullermik ukiakkut ataatsimiittoqarnerani Inatsisartuni amerlanerussuteqarluartut Inatsisartut Naalackersuisullu pillugit inatsisartut inatsisaat nutaaq akuersissutigaa. Inatsimmi tassani nutaatut § 2-mi takuneqarsinnaavoq Inatsisartut inuit qinigaattut 31-inik ilaasortaartoq. Inatsisartut Naalackersuisullu pillugit Inatsisartunut inatsimmi nutaami aalajangersakkap taassuma ilanngunneqarnissaanut tunngavilersuutaasoq tassaavoq inatsisilerisut ingerlasinnaanermikkut ilaasortat amerlassusiisa pingaaruteqarnerata erseqqissarneqarnissaannik kissaateqartoqarmat aammalu Inatsisartut qinersisartut katitigaanerisa politikikkullu piumassuseqarnerannik ersersitsisinnaanerisa qulakkeerneqarnissaa kissaatigineqarmat.

Soorunami Inatsisartut Naalackersuisullu pillugit Inatsisartut inatsisaannik allanngortitsinissaq Inatsisartuni amerlanerussuteqartut aalajangigassaraat, kingullermillu siunnersuummik assingusumik saqqummiussisoqarnera assigalugu Naalackersuisut suli isumaqarput Inatsisartut ilaasortaasa amerlassusaannik allanngortitsinissaq Inatsisartuni peqqissaartumik oqaluuserineqarneratigut pisariaqartoq. Naalackersuisut soorunami aalajangigaaq Inatsisartunit aalajangerneqartoq ataqqinnillutik atortussanngortissavaat, kisiannili tunngaviusumik peqquteqartumik aalajangiiffigisassatut siunnersuut akissuteqarfeginiarnagu siunnersuulli Inatsisartuni oqaluuserineqarqinnissaanut ingerlatinniarlugu.